

## CONVENIO DE COLABORACIÓN ENTRE A CONSELLERÍA DE POLÍTICA SOCIAL E A AXENCIA PARA A MODERNIZACIÓN TECNOLÓXICA DE GALICIA PARA O DESENVOLVEMENTO DE ACTIVIDADES DE VERÁN PARA A PROMOCIÓN DO TALENTO DIXITAL NA MOCIDADE

Santiago de Compostela, 29 de maio de 2019

Dunha parte, **dona Fabiola García Martínez**, conselleira de Política Social, actuando en virtude das facultades atribuídas artigo 34 da Lei 1/1983, do 22 de febreiro, de normas reguladoras da Xunta e da súa Presidencia, de acordo co seu nomeamento polo Decreto 98/2018, do 26 de setembro, e no uso das atribucións que lle confire o Decreto 176/2015, do 3 de decembro, polo que se establece a estrutura orgánica da Consellería de Política Social.

Doutra, **dona Mar Pereira Álvarez**, directora da Axencia para a Modernización Tecnolóxica de Galicia, actuando en nome e representación da dita Axencia, en virtude das facultades conferidas polo Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos e polo Decreto 91/2012, do 16 de marzo, polo que se nomea directora da Axencia para a Modernización Tecnolóxica de Galicia.

Interveñen en función dos seus respectivos cargos e no exercicio das súas facultades que para convir no nome das entidades que representan teñen conferidas e

**EXPOÑEN**

**Primeiro.-** A Consellería de Política Social, de conformidade co artigo 25 do Decreto 176/2015, do 3 de decembro, polo que se establece a estrutura orgánica da Consellería de Política Social ten, entre outras funcións, a xestión das actuacións en materia de xuventude, así como as políticas xuvenís de carácter interdepartamental e de apoio ao desenvolvemento da actividade xuvenil; o fomento da participación da mocidade na vida social; a coordinación e a supervisión do funcionamento das instalacións xuvenís, tanto as propias da consellería como as dependentes doutras entidades e a prestación da asistencia técnica necesaria para dar un servizo de calidade; así mesmo, correspóndelle o fomento da mobilidade xuvenil, do turismo para mozos e mozas e dos intercambios xuvenís, tanto no ámbito da Comunidade Autónoma de Galicia como no resto do Estado e no ámbito internacional e correspóndelle, así mesmo, a dirección e xestión das actuacións en materia de voluntariado, a elaboración e o seguimento dos instrumentos de planificación, de rexistro, da xestión dos órganos colexiados e todas aquelas actuacións en aplicación da Lei galega 10/2011, do 28 de novembro, de acción voluntaria.

**Segundo.-** A Axencia para a Modernización Tecnolóxica de Galicia (en adiante Amtega) é unha axencia pública autonómica encadrada nas entidades instrumentais do sector público autonómico reguladas no título III da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, tal e como se recolle no Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos.

A Amtega está adscrita á Presidencia da Xunta de Galicia e conta con personalidade xurídica diferenciada respecto da Administración xeral da Comunidade Autónoma de Galicia, patrimonio e tesouraría propios e autonomía de xestión nos termos establecidos pola normativa vixente e ten como obxectivos básicos a definición, o desenvolvemento e a execución dos instrumentos da política da Xunta no ámbito das tecnoloxías da información e comunicacións, e a innovación e o desenvolvemento

tecnolóxico.

Os seus estatutos atribúenlle, entre outras, as seguintes competencias e funcións: a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da Sociedade da Información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

Así mesmo, de acordo co artigo 5 do Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, queda desconcentrada na titular da Dirección da Amtega a competencia para subscribir con entidades públicas e privadas, en nome da Amtega, convenios de colaboración excluídos da lexislación de contratos do sector público.

**Terceiro.-** A Consellería de Política Social, a través da Dirección Xeral de Xuventude, Participación e Voluntariado, ofrece, ano tras ano, a posibilidade de que a xuventude galega empregue o seu tempo libre estival participando en actividades de educación non formal moi diversas: de carácter cultural, ambiental, deportivo, de tempo libre, de voluntariado, entre outras, que sirvan non só para divertirse, senón tamén para o seu enriquecemento persoal e vital.

A Consellería executa sucesivas *Accións de verán*, que se desenvolven en albergues e campamentos xestionados pola Dirección Xeral de Xuventude, Participación e Voluntariado ao longo de toda Galicia.

**Cuarto.-** A Amtega está a desenvolver o Plan de Promoción do Talento Dixital de Galicia – Digitalent 2020 – cun eixo adicado ás Vocacións Científico-Tecnolóxicas, orientado a estimular o talento precoz no ámbito das Tecnoloxías da Información e Comunicacións, e fomentar o atractivo vocacional das profesións científico -

tecnolóxicas entre a poboación máis nova, con especial atención entre as mozas. Estas profesións identifícanse baixo o acrónimo STEM derivado das iniciais en lingua inglesa das palabras ciencia, tecnoloxía, enxeñería e matemáticas.

O eixo de vocacións STEM articula diversas iniciativas, entre as que está a realización de Campamentos Digitalia: campamentos de verán cunha serie de obradoiros que teñan como obxectivo pór en valor as capacidades e empregos dixitais para acadar un incremento das vocacións tecnolóxicas entre os mozos e mozas galegas.

**Quinta.-** Unha política xuvenil eficaz precisa da articulación de actuacións conxuntas e coordinadas entre distintos departamentos da Xunta de Galicia que teñan intereses comúns e obxectivos coincidentes, sumando esforzos cara ao desenvolvemento integral da mocidade galega.

**Cuarto-** Tendo en conta o anterior, a Consellería e a Amtega manifestan a súa vontade de colaboración e con tal finalidade acódesse a un suposto dos previstos no artigo 14 e seguintes da Lei 14/2013, do 26 de decembro, de racionalización do sector público autonómico, que establece que a Administración xeral da Comunidade Autónoma e as entidades do sector público, ou estas entre si, poderán formalizar acordos de colaboración ou cooperación para o servizo aos intereses xerais mediante o desempeño conxunto de tarefas de interese público da súa competencia.

**Quinto.** A colaboración da Consellería e a Amtega instruméntase coa finalidade de promover o desenvolvemento de actividades de verán para a promoción do talento dixital na mocidade.

Polo anteriormente exposto, as partes acordan a sinatura do presente convenio de colaboración, con base nas seguintes:

## CLÁUSULAS

### **Primeira. Obxecto**

A través do presente convenio establécense as condicións polas que se rexerá a colaboración entre a Consellería de Política Social e a Axencia para a Modernización Tecnolóxica de Galicia para o desenvolvemento o desenvolvemento de actividades de verán para a promoción do talento dixital na mocidade.

### **Segunda. Actividades para desenvolver**

No ámbito da colaboración entre a Consellería e a Amtega, levarase a cabo un programa de actividades de educación non formal a través de tres (3) campamentos de verán dun máximo de oito (8) días, do 31 de agosto ao 7 de setembro, en réxime de internado, nas instalacións do Albergue Xuvenil de Gandarío, en Bergondo, A Coruña, dependente da Dirección Xeral de Xuventude, Participación e Voluntariado.

Os campamentos desenvolveranse nas seguintes temáticas:

- Video Mapping. Fai visible o que levas dentro: 10 prazas.

Achegamento á composición de vídeos para representacións nocturnas sobre edificios. Os participantes poderán coñecer os principios necesarios para crear animacións de vídeo, e mediante o emprego de ferramentas informáticas serán quen de crear as súas propias composicións e compartilas cos seus compañeiros, mesmo con proxeccións nocturnas no propio albergue.

- A vista de paxaro. Primeiros pasos con drons: 20 prazas.

Achegamento aos fundamentos que permiten a creación, control e vo dun dron. Os participantes poderán coñecer os principios necesarios na tecnoloxía de drons, e mediante o emprego de ferramentas informáticas e manipulación de drons adaptados á súa idade, serán quen de comprobar os seus coñecementos e experimentar coas enormes posibilidades da tecnoloxía dos drons.

- Adestrando ao meu robot. 20 prazas

Achegamento aos principios tecnolóxicos que son necesarios para construción, funcionamento e mellora no control de robots sinxelos, mediante o emprego de ferramentas informáticas e traballo en equipo, superando pequenas probas ou retos coa aplicación dos coñecementos aprendidos.

Nas actividades poderán participar os mozos e mozas galegos que teñan entre 12 e 14 anos. En concreto, no campamento "Video Mapping" poderán participar persoas nadas no ano 2005 e nos outros campamentos as nadas nos anos 2005 e 2006. Facilitaráselles:

- Aloxamento no albergue xuvenil de Gandarío, cun máximo de sete (7) noites por campamento.
- Manutención completa.
- Programa de actividades para desenvolver, equipo técnico responsable, así como o material preciso para o seu desenvolvemento.

O desprazamento ata os aloxamentos será por conta dos participantes, tanto o día de inicio como o de remate.

### **Terceira. Compromisos**

A Consellería de Política Social, a través da Dirección Xeral de Xuventude, Participación e Voluntariado aportará as instalacións e persoal do albergue xuvenil de Gandarío, incluíndo a aula de informática para vinte (20) usuarios, o aloxamento e manutención, así como a xestión do procedemento administrativo para a admisión e xestión das relacións cos participantes.

A Amtega asumirá a docencia tecnolóxica das actividades de Video Mapping, de Drons e de Robótica, os materiais específicos, así como os monitores de tempo libre necesarios, no número de un (1) monitor como mínimo por cada dez (10) rapaces, durante a duración da actividade.

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), e na Lei Orgánica 3/2018, do 5 de decembro, de Protección de Datos Persoais e garantía dos dereitos dixitais, e a normativa de desenvolvemento.

#### **Cuarta. Financiamento**

⑩ A Axencia para a Modernización Tecnolóxica de Galicia financiará os custos das accións do presente convenio que asume como propias, ata un máximo de vinte e cinco mil euros (25.000,00 €) con cargo á partida orzamentaria 04.A1.571A.640.0 dos orzamentos xerais da Comunidade Autónoma de Galicia para o ano 2019.

⑩ A a Consellería de Política Social financiará os custos das accións do presente convenio que asume como propias, ata un máximo de dez mil euros (10.000,00 €), que se financian con cargo as correspondentes partidas orzamentarias

dos orzamentos xerais da Comunidade Autónoma de Galicia para o ano 2019, entre as que poden sinalarse as seguintes:

12.05.313A.221.05–Gastos de mantenza.

12.05.313A.131.24 - Gastos de persoal por acumulación de tarefas.

#### **Quinta.- Vixencia**

O presente convenio entrará en vigor na data da súa sinatura, e terá vixencia ata o 31 de decembro de 2019, sen prexuízo das posibles prórrogas (por períodos anuais ata o máximo de 4 anos) ou addendas que, no seu caso, poidan acordarse nas que necesariamente figurarán as actuacións a desenvolver e o financiamento correspondente.

#### **Sexta.- Comisión de seguimento**

Para a vixilancia, seguimento e control da execución do Convenio, así como para propoñer solucións aos conflitos que poidan xurdir na aplicación e interpretación das súas estipulacións, constituirase unha comisión paritaria que velará polo seu cumprimento e que estará composta por un representante da Amtega, nomeado pola Directora da Amtega e por un representante da Consellería de Política Social, nomeado polo Conselleiro.

A súa actuación axustarase ao establecido na Lei 14/2013, do 26 de decembro, de racionalización do sector público autonómico e na Lei 16/2010, do 17 decembro, de organización e funcionamento da administración xeral e do sector público autonómico de Galicia.

#### **Sétima.- Publicidade**

Este convenio será obxecto de inscrición en cumprimento do establecido no artigo 15 da Lei 1/2016, de 18 de xaneiro, de transparencia e bo goberno.

As partes asinantes autorizan/consinten na publicidade dos seus datos persoais e demais especificacións recollidas no presente instrumento de colaboración no Portal de Transparencia e Goberno Aberto.

Segundo o artigo 17 da Lei 1/2016, do 18 de xaneiro, de transparencia e bo goberno, ademais da información que debe facerse pública segundo a normativa básica en materia de transparencia, publicarase o texto íntegro do protocolo.

#### **Oitava.- Resolución**

As partes poderán modificar ou resolver este convenio en calquera momento por mutuo acordo. Así mesmo, poderán denunciálo en calquera momento por vontade expresa de calquera das partes cun aviso previo de quince días naturais.

O incumprimento de calquera das obrigas contraídas neste convenio por unha das partes facultará á outra para resolvelo, cos efectos que legalmente procedan.

#### **Novena .- Modificación da actividades obxecto do Convenio.**

1. Cando por circunstancias técnicas sexa imprescindible variar o contido específico das actuacións ou os prazos recollidos no presente convenio, as partes asinantes poderán acordar a modificación do convenio sempre que a actividade, conduta ou modificación do proxecto este comprendida dentro do obxecto deste convenio de colaboración.

2. De acordo co disposto no artigo 31.4 da Lei 14/2013, do 26 de decembro, de racionalización do sector público autonómico, o convenio poderá ser obxecto de

modificación cando teñan como finalidade o logro dos obxectivos de estabilidade orzamentaria e sostibilidade financeira. Ditas modificacións terán por obxecto a redución do volume das obrigas ou a ampliación do seu prazo de execución.

### **Décimo .- Inexistencia de relación laboral**

A subscrición do presente convenio non implicará relación laboral, contractual ou de calquera outro tipo entre os profesionais que realicen as actividades por conta da Consellería de Política Social obxecto deste convenio e a Axencia para a Modernización Tecnolóxica de Galicia.

Asemade a subscrición do presente convenio non implicará relación laboral, contractual ou de calquera outro tipo entre os profesionais que realicen as actividades por conta da Amtega obxecto deste convenio e a Consellería de Política Social.

### **Décimo primeira.- Réxime xurídico e resolución de conflitos**

O presente convenio, que ten natureza administrativa, e rexerese pola Lei 14/2013, do 26 de decembro, de racionalización do sector público autonómico, pola lexislación en materia de contratos do sector público e polas demais normas de aplicación.

As discrepancias que poidan producir resolveranse nos termos previstos no artigo 18 da Lei 14/2013, do 26 de decembro, de racionalización do sector público autonómico e no artigo 13 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, para os conflitos de atribucións.

### **Décimo segunda .- Normativa aplicable**

O presente convenio de colaboración rexeráse especialmente por:

- Lei 16/2010, do 17 decembro, de organización e funcionamento da administración xeral e do sector público autonómico de Galicia
- Lei 14/2013, do 26 de decembro, de racionalización do sector público autonómico.
- Acordo adoptado polo consello da Xunta de Galicia na súa reunión do día 27 de marzo de 1991 e feito público mediante Resolución da Consellería de Economía e Facenda de data 8 de abril de 1991, sobre convenios de cooperación con outros entes públicos e de colaboración con particulares.
- A Lei 1/2016, do 18 de xaneiro, de transparencia e bo goberno, nos seus artigos 15 e 17.

E, en proba de conformidade, asínase o presente convenio no lugar indicado no encabezamento

A directora da Axencia para a  
Modernización Tecnolóxica de Galicia

A Conselleira de Política Social

Mar Pereira Álvarez

Fabiola García Martínez

